

Sepakat wujud mekanisme tangani isu migran Indonesia

Joko Widodo
hargai komitmen
Anwar cari jalan
penyelesaian,
lindungi pekerja

Noor Atiqah Sulaiman
bhnews@bh.com.my

Kuala Lumpur: Indonesia dan Malaysia sepakat membentuk satu mekanisme khusus bagi menyelesaikan isu migran negara itu yang berada di sini.

Presiden Indonesia, Joko Widodo, berkata beliau menghargai komitmen diberikan Perdana Menteri, Datuk Seri Anwar Ibrahim, yang melindungi pekerja dari negaranya.

“Saya sangat menghargai komitmen Anwar untuk memperkuat perlindungan dan undang-undang yang adil kepada pekerja Indonesia.

“Berikutan itu, saya dan Anwar sepakat untuk membentuk mekanisme khusus bilateral bagi menyelesaikan masalah migran Indonesia.

“Selain itu saya juga minta supaya untuk segera mewujudkan satu pusat pembelajaran komuniti dan warga negara Indonesia yang kini ditahan di depoh imigresen untuk segera dipulangkan.

“Malah sistem satu saluran juga harus dioptimalkan,” katanya pada sidang media di Kompleks Seri Perdana sempena lawatannya ke Malaysia semalam.

Terdahulu, Joko Widodo dan Anwar turut menyaksikan pertukaran dokumen bagi enam ins-



Anwar bersama Joko Widodo ketika meninjau di sekitar Pasar Chow Kit, Kuala Lumpur, semalam.

(Foto BERNAMA)

trumen yang dimeterai semalam bagi memperkasakan hubungan kerjasama kedua-dua negara.

Antara instrumen yang dimeterai ialah membabitkan perjanjian rentas sempadan, perdagangan sempadan, kerjasama promosi dan pengiktirafan bersama pensijilan halal bagi produk domestik.

Mengulas lanjut berkaitan dengan instrumen yang dimeterai, Joko Widodo menyambut baik dengan penyelesaian rundingan berkaitan Laut Sulawesi yang dapat diselesaikan semalam.

“Selepas 18 tahun proses rundingan diadakan, alhamdulillah hari ini (semalam) ia dapat diselesaikan. Saya juga berharap rundingan perbatasan yang lain termasuk Pulau Sebatik dan lain-

nya juga dapat diselesaikan kelak.

“Harapnya, Perdana Menteri-nya masih Datuk Seri Anwar dan Presiden Indonesia masih Jokowi,” katanya.

Rundingan sempadan di Laut Sulawesi dan bahagian paling selatan Selat Melaka dilakukan sejak 2005.

Dalam pada itu, Anwar pula turut menzahirkan penghargaan

atas komitmen Jokowi memberi kerjasama untuk memudahkan proses penyelesaian isu persepadaan itu.

“Ini hubungan sangat akrab serta memudahkan dan saya bangga dengan pimpinan dua-dua negara hari ini (semalam), kita dapat selesaikan satu isu yang telah kita runding selama berpuluh tahun,” katanya.